

四庫全書

集部

欽定四庫全書

文莊集卷八

宋 夏竦 撰

表

謝天慶節御筵表

臣某言元符紀序恭館示慈仰戴恩榮俯增震慄伏惟
皇帝陛下齊心靈寶結念洞章結真緒之延鴻敞密都
之神麗順發春之初吉薦有帝之強名奉鏤玉之珍文
秘凝雲之峻閣言旋詔蹕式屬慶辰乃眷攸司爰頒寵

宴挹流霞之醇旨咀芳蒞之馨香雖共遂於屬厭實愈增於寅畏誓更勤於淬礪用仰答於照臨

謝賜御製真遊頌表

臣某等言伏蒙聖慈賜臣等御製真游頌一首者中禁延真誕章於寶緒西清繹思濬發於乾文仰荷寵頒伏增榮感中謝伏惟皇帝陛下淵明天縱睿哲日新達虞舜之四聰茂周文之九德元符申錫丕顯於眷懷盛節交脩宣臻於明察是以皇穹報降真祖下臨諭長發之

遐源示聿懷之密命簡冊肇崇於徽稱樵蒸式展於上
儀崇慶節以載嚴肇真宮而克謹洪惟祕殿實佇仙遊
將永紀於鴻禧必載垂於金刻臣等不量淺識竊貢陋
聞願裁雅奧之辭用廣欽崇之意果蒙睿造俯徇至誠
罄欽翼之清衷著游揚之嘉頌叙乘雲之妙化述感電
之明靈昭兩儀是輔之祥顯二聖克開之祐將載刊於
穹石爰出賜於下臣日月並明降鴻輝於聖域河洛開
奧分寶宇於私門寵極朝倫榮深望外顧恩私而莫報

惟抃蹈以增榮

謝賜御製真遊殿頌表

臣某等言伏蒙聖慈賜臣等御製真遊殿頌一軸者碧輦乘風載臨於夙禁寶跗摘藻濬發於雲章仰荷頒宣俯增榮懼中謝伏惟尊位皇帝陛下多能攸縱典學惟新法堯帝之安安體周王之翼翼赤文綠字申錫於元符蒼壁黃琮交脩於盛節虛皇乃眷飈御下臨議積累之遐源示顧懷之景命協吉肇尊於徽冊升禋式薦於明

誠紀慶節於令辰肇靈宮於福地洪惟祕殿實降元真
仙衛雖廻天香尚靄亟徇封章之請庸增棟宇之規遂
易鴻名式新題榜躬著游揚之頌誕昭欽翼之心叙駕
羽之至神贊合符之明德宣二聖緝熙之道播兩儀顧
望之祥將再勒於堅珉爰出頒於近列臣等親逢旦暮
曲荷恩私列緯成文方騰於聖域慶雲垂彩忽被於私
門徒瞻倬彼之明莫測煥乎之盛唯珍藏而知幸固圖
報以無階慶抃兢榮倍萬倫等

謝賜御製文表

臣某言雲漢之文肇加於銓次圖書之府遽奉於頒宣
實典守以為榮固寶藏而斯幸中謝伏惟尊位皇帝陛
下靈承乾則欽翼帝圖當四貉之來同顧萬幾之多暇
叩真樞而訪道闢藝圃以游心爰時敏於厥修用克昭
於將聖由是博觀篆素包舉藝文當乙夜之凝嚴遇西
清之閒晏必憲章古昔嘉歎祥祺導勵翼之清衷美光
華之時景宏敷睿藻亟發宸章屢移銀箭之聲繼竭金

壺之墨用發揮於九德實經緯於兩儀玉音常溢於絳
臺藻簡載盈於綠蘊暨合祛魯嶽奠瘞魏睢述祖祐之
鴻猷叙天人之元命紀山川之勝勢贊仙釋之神靈潛
運天材並馳宸翰銀書金刻爛雲景於名區玉籥朱弦
播咸韶於樂府令輔臣之擬議俾史氏以編聯辨六樂
之音容序五辰之躔次公車奏御方載飾於芸籤冊府
爰頒俾分藏於金匱臣等叨塵近職獲備攸司被慈旨
以知榮啓寶題而竊抃並義文之象繫永鎮書林冠堯

舜之典謨遐光聖域載惟慶幸倍萬常均

謝和御製詩表

臣某言景亳靈區再登於嘉瑞薰弦妙韻遽播於宸章
叨下濟以知榮奉乃賡而增愧中謝伏惟尊號皇帝陛
下寅威密命誕服慶基祗接真游誕膺於寶誨丕承道
蔭茂集於繁禧眷惟指李之鄉昔構猶龍之館將潔誠
而嚴祀爰先置而戒期偉兆有開柔靈獻祉仙檜重芳
於福地嘉苗再實於良田矧茲刈穫之家允叶聖真之

緒載敷神唱恭述靈心煥彼簡編永著自天之祐薦於
郊廟遐宣治世之音臣幸預近司叨頒睿藻私門傳寶
仰欽雲漢之章燥吻微辭謬續柏梁之韻共循荒陋彌
積兢慚

謝宣召觀聖像表

臣某等言真馭俯臨載形於繪事宸慈曲被俾預於榮
觀載瞻章漢之文共積逢辰之幸中謝伏惟尊位皇帝
陛下欽順景靈務昭於翼翼紹宣先烈載極於蒸蒸自

備受於元符實交修於盛節皇穹是輔密命有開降雲
襦於中宸諭璿源於太古簡冊肇尊於徽號樵蒸式展
於鴻儀而睿志彌虔精心允迪爰令哲匠恭寫眸容玉
相金姿凝嚴而如在瑞雲仙衛炳煥而咸分爰形美述
之文祇叙降真之蹟用極形容之妙誕昭積累之祥臣
等獲總樞機親逢旦暮曲荷聖明之睠獲瞻繪素之儀
載仰威靈共增榮感更誓自公之節少酬逮下之仁

謝賜御製冊府元龜序表

臣某等言伏蒙聖慈賜臣等御製冊府元龜都序者東
觀紬書用成於國典西清覃思濬發於乾文革舊日以
垂鴻冠羣篇而作範共循榮遇孰可稱言伏惟尊位皇
帝陛下審聽高居繼統揚業多能天縱仁聖之事既該
嘉言日章帝王之道大備總六經而觀法宗四術而教
人貴敦學之風右藏書之府補綴漏逸脩起廢遺禮樂
備於朝廷弦誦盈於庠序施溫雅之號令四方唯寧垂
深厚之訓辭百工用乂頃穆清之多暇稽雅故以鋪觀

考邦國之大倫見君臣之往躅紛綸寡要沮勸無章將
區別於源流俾辨明於淑慝爰發聖詔申命下臣陳廣
內之圖書給蘭臺之筆札發凡起例當類聚以羣分原
始要終必備言而廣記旌小善而咸錄遏大惡而勿揚
極惟聰垂教之規適太上立言之體而臣等藝能淺陋
頌次顓蒙但祇稟於聖謨莫建明於大義至於舊章參
互衆意異同旌別遺方推揚垂當皆賴發揮之旨方成
倫理之文既歲月以滋多顧簡編而僅就恭惟序引實

總綱條苟非述自宸衷加於藝圃則何以炳皇王之軌
範昭臣子之楷模遂列奏於公車願飛英於聖域果蒙
聖造俯徇羣心摘章漢之睿辭振經天之懿律兼條總
貫致遠鉤深紀烈祖之靈圖敘神宗之大訓輯羣元而
精密敷奧理以昭融典謨立而書教宣乾坤設而易道
備恭聞睿旨克暢先猷蓋曩處於震宮爰日趨於幄坐
欽承諄誨丕闡宏規將以考歷代之遺音建一王之茂
範著於編紀昭示勸懲惟聖作之有開屬昌辰之善繼

周武能述式廣於丕圖陶唐乃文彌恢於至德而乃特
紆宸慮肇建鴻名昭鑒戒之大猷顯欽明之精意首青
編而有耀題綑帙以惟新豈獨翰墨之榮俯加於多士
固乃文思之德永被於生民凡同側管之闕共積逢辰
之幸歡呼抃蹈倍萬等倫

謝宣赴龍圖閣觀芝草慈烏表

臣某言賴鄉先置並獻於千祥內閣榮觀首私於四近
殊尤竄異歎誦何勝中謝竊以芝產九莖聞彼漢房之

典烏生八子傳諸秦桂之歌詎有時萬凝祥方冬載育
蓋式昭於茂祉實允屬於昌辰伏惟尊位皇帝陛下虔
輦臨民寅威順帝法陶唐之稽古專講於舊章體高陽
之潔誠宣臻於盛節接真游而允穆尊妙道以尤崇眷
惟指李之墟昔屬猶龍之館靈心有朕方致於精衷黎
首聿臻願修於明祀爰咨近輔經始神區當備物之初
辰變載陽於愛景天和茂暢地寶交騰茁彼靈芳叢生
福地固彌川而億計亦賦象以千名矧返哺之慈禽競

營巢而乳穀宣昭協氣茂發鴻禧亟披藝而考祥遽置
郵而承獻肅陳中禁既凝穆而載闕嚴召近司俾周旋
而審覲示休嘉之碑隱彰見象之日昭臣謬備樞衡親
逢旦暮共膺絲旨仰奉睿祺瞻菌蠢之英如游於台嶺
俯畢逋之狀若對於義輪蓋盛德之昉分感殊徵之蠶
涌祇迪天人之際實惟明聖之符拊蹈欣榮倍萬倫等

謝賜大酺詩表

臣某言伏蒙聖慈賜大酺詩者堯酒推恩誕均於純錫

舜絃流韻祇述於繁禧遽叨拜賜之榮實積逢辰之幸
中謝伏惟尊位皇帝陛下惠和洽物恭儉愛民祖武宗
文紹宣於馨烈尊道貴德丕顯於大猷惟上帝之顧懷
感真游之降格示克昌之詒訓諭長發於鴻源陽位升
煙聿修於嚴報中衢置酒務洽於多歡屬照日之載臨考
舊章而斯啓玉篇均和珠躔宣麗昭三神之景祐洽萬
國之歡心臣幸豫近司叨頒睿藻聞韶率舞徒欽善美
之音測管仰闕莫達高明之體惟銘藏而知幸固補報

以無階

謝批答允賜御書表

臣某言玉宸觀像肇啓於殊庭雲漢分暉仰承於俞詔
中謝伏惟尊位皇帝陛下參侔闔闢包舉藝文陰偶陽
奇玩義文而滌慮天五地六憲周德以宣英鼓聖域之
芳風騁書林之珍駕流徽金石鋪藻縑緗妙萬化以為
言布羣方而成誦矧清都之載敞惟上士之咸依但瞻
曲密之規未識昭回之采臣等幸逢嘉會誤備攸司再

竭丹情仰祈睿製榮河開奧預降於絲言恭館凝祥將
藏於鳳蘊佇導迎而協吉唯舞詠以知榮

謝賜御書表

伏蒙聖慈以臣所乞御書特蒙頒賜者昭回散彩方謝
於頌宣雅奧垂文載形於敦諭捧窺榮抃循省震惶中
謝恭惟尊位皇帝陛下上德淵冲聖謨光大體雷雨之
甘潤象日月之昭明成茲既富之民被以乃文之化每
裁制於物力致蕃衍於貨財竊惟內府之興實自先朝

之畫皆以節用於已圖儉於豐收六尚之美羸為九年之備預至於優賞降附梟翦寇戎厚慶賜於勲勞廣鴻儀於祭享國有經費民無暴征允屬昌辰益隆先訓况復方隅罷警年穀順成貨殖阜通京坻饒衍務省乘輿之服御愈豐帑藏之資儲爰命增修以登輸委復徇史臣之請特擣神筆之文述儲峙之通規昭祖宗之懿範鸞龍奮藻雲漢為章固宜刻石填金並三辰而垂耀經天緯地冠九德以流芳成湯篆刻於盤孟夏后鏤銘於

箕簾莫擬範圍之妙徒居象繫之先臣叨備攸司誤蒙殊眷慚對天而測管固游聖以無階自慶遭逢彌增踴躍遂奏尺牘以陳寸誠豈謂鴻私俯頒優詔穹旻不宰惟下濟於光明螻蟻無能難上醕於覆露但持頑朽少效涓塵

謝賜生日羊酒米麵表

臣某言函詔垂文簋羞異數循惟榮會內積感悰中謝竊以宴餼之私殮牢有等本周官五數之給及漢酎上

尊之良務勸賢庸俾從禮食矧近庭之備列繇誕日以
將恩事出先規名存彝範如臣者起於羈藐早竊盛名
以斐章而潤帝言以淺識而參內務不稼而取禾百億
每媿素飡縣弧而有志四方洊逢嘉序感念肯堂之訓
聿深轉轂之悲豈謂伏蒙尊位皇帝陛下曲禮空屬特
延賚及降使璫於禁闥輟膳具於君庖鼎爨踰豐觴蠶
有衍會里中相愛之舊共喜屬厭備俎間決勝之謀何
階補職惟誓竭忠之効庶為圖報之期

謝賜衣著銀器表

臣某言今月二十一日伏蒙聖慈特賜臣衣著五十匹銀器五十兩者鴻私俯及蕃錫有加拜賜已還循涯增愧中謝伏念臣幸逢運會誤玷官常自對問於嚴宸洎備員於諫省最為孤進盡出異恩常感慨以無從冀傾心而自効服勤夙夜況瘁簡編仰誦睿文虔遵聖誘顧顓蒙之有素終篆刻以非工近者法御戒塗真區薦玉獲掌坤儀之奏謬裁帝子之章屬辭雖極於寅恭足意

莫臻於平徹靜思無累靡敢起居豈謂伏蒙皇帝陛下
逮下敦仁包荒著象慮永淵之積悚頒器幣以推恩輝
耀里閭榮周族屬敢不竭心竹素誓節松筠更增時螳
之勤仰答菁莪之育兢惶感忭倍萬常均

謝皇太后賜生日禮物表

臣某言星闈遣使芝檢申恩恭拜貺以懷兢仰逢辰而
累抃中謝恭以國家推宴好之式用廣惠慈念臣鄰之
勞克先體貌加禮有陞廉之峻陪餐從壺豆之差務致

便蕃用為旌勸伏念臣本惟材譴夙稟性愚濫竊清階
屢登華貫誤備國樞之選得聞君幄之謀屬中火之在
辰協左弧之記日溫言嗣獎厚餽旅陳芬庖具於七牢
湛栢醇於九醞此蓋伏遇皇太后陛下深矜昧進俯注
神襟謂先聖之舊規本於慎守眷邇庭之備位亮乃無
他曲沛褒章實為榮遇坐累茵而不逮但感恩親食四
簋以加豐彌銜序舊敢忘盡瘁庶用竭忠

上太皇太后賜生日禮物表

臣某言伏蒙聖慈以臣生日特降詔書賜臣羊酒米麵者使駢臨泣詔語溫純出上賜之便蕃溢家庭而焜耀中謝伏念臣適時無取擇道不明僅有小忠誤叨大任濫賦千鍾之祿未施四體之勤敢謂皇慈記其生旦頒分於居第俾難老以在庭恩厚不貲命微莫稱此蓋伏遇太皇太后陛下至誠好禮以道任官顧新政之方行雖舊儀而不廢因加多物曲示隆恩君賜有餘恐奉親而莫及公朝無諱誓報國之為先

樞密院謝宣召宴游表

臣某言仰承嚴召久侍中宸共戴慈榮伏增感抃中謝
伏惟尊位皇帝陛下誕鍾嘉會懋建遠圖祇適詒謨茂
昭於孝德欽膺秘籙交舉於盛儀既朝曲里之祠繼畢
圜壇之禮蕃禧允茂大慶方均當春日之載陽屬萬幾
之多暇遽宣慈旨式詔近司趨廣內之層闈仰先朝之
睿札金滕乍啟畏軒臺如在之靈緇帙載瞻契周鼎卜
年之數加以聖明善繼琬琰垂文列典籍以星繁播

聲詩而玉振亟由亭榭再歷巖巒睇層閣之相望矚羣
芳之鬯遂奉威顏之粹穆從天步以遲留屢承列席之
觀爰奉流觴之宴饋款洽洄而繼至龜龍刺鏤以載浮
投芳餌於文竿對叢枝於采檻移晷共聆於雅奏洗心
載仰於宸章矧奇石之羣分有睿辭之徧紀或垂金版
或麗翠珉昭回之采交輝清越之音相入而又示慈琳
殿拜賜瓊跗法酒九行奉宸歡而愈洽晝日三接承寵
睠以彌隆洎復私門恍如宵寤昔壺中巖麗長房但舉

於甘肴帝所樂游簡子止聞於廣樂何親逢於旦暮且
事絕於名言共揣庸微曷勝優暇詠鹿鳴之什既誓於
盡忠歌天保之章更祈於報上兢榮感媿倍百常均

謝賜御書并御寶表

臣某言今月五日入內內侍省内侍殿頭楊餘懿到州
伏蒙聖慈賜臣御書文字御寶封全者孤寒際會早奉
於龍潛睿哲哀憐遠頒夫寶篆兢榮拜賜感懼交懷中
謝伏惟皇帝陛下典學生知聖能天縱自東華之毓德

賁先聖之詒謀博貫七經誕彰百行仰屬代明之始彌
隆繼志之心躬決萬幾兼該六藝矧乃飛毫之妙尤精
拂素之書回鸞鳳於筆端越天人於意表俄成寶字遠
錫舊臣念犬馬之前勞慰江湖之遠宦齋心仰止若對
於威顏舉族自量何勝於聖念

文莊集卷八

欽定四庫全書

文莊集卷九

宋 夏竦 撰

表

進和御製豐年歌表

臣某等言禁苑登豐於首種薰弦濬發於宸章媿非臣
和之材猥奉帝庸之作中謝伏惟尊位皇帝陛下惠和
布政勤儉化人式昭務本之心克謹授時之教唯豐地
利以厚民天將遠察於農時在近觀於穡事顧金華宥

密之地有鈎盾宴游之田申命攸司播時宿麥瑞雪屢
滋而吐秀景風潛扇以垂黃乃駐乘輿臨觀刈獲嘉如
坻之倍獲知率土之咸豐爰均賜於近臣遽誕宣於睿
唱昭覆載至仁之意播咸韶盡美之音臣等素乏藝文
誤塵清要幸奉緝熙之德猥叨賡載之榮遊聖無階但
仰昭回之象鏤冰曠日僅成蕪累之辭將瀆凝嚴預增
慚愧

和水清木連理詩表

臣某言嘉瑞荐臻方深於慶抃宸章濬發忽預於賡颺
載省庸虛惟增隕越中謝伏念臣等藝能庸淺性識顓
蒙幸會休明誤塵甄獎日奉好文之德親承善教之言
在刻志以彌勤顧遣辭而愈拙此者伏遇尊位皇帝陛
下欽崇六藝顧諟三靈法陶唐之率常稽夏后之象物
欽修聖統昭式天才昨自玉牒上封金枝西祀鴻休四
發瑞命綸紛靈稷下流嘉生茂遂矧茲奇木載擢祥枝
當獻歲之良時式符於熙盛對清心之秘殿雅契於隆

平用丕顯於景靈遂宏宣於睿唱迴五辰之藻麗綴四
始之芳蕤固將金字銀書遐光於篆素朱干玉籥永被
於聲歌臣等幸預榮班叨聞妙韻遽命已歛之作載賡
韶護之音雖牽率而僅成固滔堙而仰止況翔陽之下
久銷螢燐之光豈建木之陰可耀蒿萊之質預增愧慙
尤切兢惶

進和御製占城國貢師子詩表

臣某言瑞獸來庭薰弦發唱獲繼帝庸之作實非臣和

之材載省疎蕪但增慚慙竊念臣叨塵官序際會文明
莫勤日益之功徒奉化成之德此者伏遇尊位皇帝陛
下言惟妙物道實通微懿文德以經天靡聖風而柔遠
夏茲荒服承獻靈猊用昭式於休光遂敷施於睿藻協
筦弦而振律潤竹素以垂鴻造物之功尋楷模之可究
秉陽之象仰躔次而可觀臣叨奉恩私俾令廣載但軍
研之精爽唯罄竭於頑駑用綴蕪音少酬天獎上塵旒
纓唯積憂兢

進河清賦引表

臣某言竊覩祀汾陰經度制置司陳堯叟奏黃河清於
保平軍者伏以惟德是輔三世其昌俟河之清一旦斯
至光昭宗社之慶煥發天人之符臣某中謝恭惟尊位
皇帝陛下茂大中之功隆太上之德本支百世磐石非
堅壽考萬年南山未永制禮作樂類帝禋宗六龍將幸
於汾祠九曲載清於陝服儒宮獻頌學館陳詩臣雖典
豆區叨親簡謀極言中選曾叨多士之間奏賦歌詩敢

繼大夫之後仰干震耀懼切氷淵

上景德五頌大中祥符頌引表

臣某言准中書劄子奉聖旨依奏令進景德五頌并大中祥符頌者下臣有請傾匪石之丹心上帝曰俞降如絲之睿旨震惶無所欣愧踰涯臣誠感誠懼頓首頓首臣聞靈鳥升歌告湯孫之景貺昊天著頌美周室之成功被以管絃薦之郊廟振明光於萬世昭茂實於三儀爾後王道陵遲頌聲彫缺非曠大夫之職豈無博士之官

蓋成命未融則斯文不作我國家圓方右序中外穆清
撥五代之亂離繼三皇之昭夏黼黻冠冕正列采而象
乾坤櫜楫壘簾廣德音而事祖考恭惟尊位皇帝陛下
春秋鼎盛聖睿日躋御天球及河圖受元符與黃瑞英
聲蜂涌惠露春流承龍翼於咸平致鴻鈞於景德北戎
震疊泥首幽并左纛雍容朝陵鞏洛著訓農之懿典頌
勸學之彝章澤浸幅員仁翔海外文武際天而接地靈
祇流慶而發祥介瑞星辰告休符籙冠黃虞之故實掩

唐漢之聲明道通九夷執玉萬國考典墳而未有極翰
墨以難名巍乎皇乎廣矣大矣當是時臣工清廟詎可
以美形容金牒玉函豈足以昭姓氏太史珥筆不暇紀
豐功良士在庭未能歌至化豈臣庸昧敢頌清明蓋念
胄緒孤平藝文淺陋遭逢陛下拔擢流中爲萬乘之門
生登六科之丙第隸官膳寺將命南州雖竭慮以安民
奈無階而答祿臨文振袂撫劍馳魂幸齒髮之未衰冀
君王之可報以是區分簿領刻念典謨極精爽之再三

頌猷微之萬一欲輸塵露少擬聲詩遂昧死而獻言方
伏膺而待罪恭惟陛下恢崇至聖敦勸素風無言不讎
無德不報迴曜靈之列景照時藎之至心特降綸言爰
從奏請敢不擬子淵而匠意倣吉甫以裁章飾陋彫頑
間旒瀆纊伏願皇帝陛下念臣嘗叨天獎曾近帝暉當
垂拱之餘時遇觀書之暇日曲迴宸鑒少聽蕪音寬棹
斧之嚴誅軫昆蟲之微意百世斯幸萬死甘心抑又聞
英主難逢良時罕遇河圖不至宣父興嗟岱岳未封相

如馳恨臣常自慶生實逢辰既踰弱冠之年便遇泥金
之禮在於今日萬世一時苟不能目覩陶匏足升壇墀
以斯爲士曷若無生今陛下丕奉珍符恭行大典適遂
羣生之欲豈違庶品之誠願令臣隨一禮官執一祭器
覓抃徐鑒之後駿奔緹騎之間瞻雲瑞於封中聽神聲
於岳下伴禽魚而舞躍隨耆幼以謳歌時頌鴻徽上疇
靈澤是則死當不朽生有餘榮永念丹誠有如皦日臣
無任瞻天望聖激切懇禱之至

進王中正神道碑表

臣某言伏奉聖旨令臣撰贈鎮南軍節度使王中正神道碑者密命開先實異人之傑出溫珉紀事顧惜學以非長將仰瀆於穆清但預增於震悸中謝伏以王中正早緣靈契仰對真游通宥密之嘉言啟龐鴻之聖佑繼成慎默稽往哲以難偕茂實殊尤考前編而未覲蓋邦家之累盛感奇偉之間生昭紀遺芳合歸鴻筆如臣者大非約史學不傳經當先臣盡節之初纔霑一命洎制

榮叨榮之後方越十年獲起草於東宮參代言於西掖
雖編研而自勵終驚蹇以難稱每慚菲薄之才孤奉文
思之德在於昧進久已逾涯豈謂伏蒙皇帝陛下不以
疏賤棄遺不以顓愚爲罪過垂慈惻曲記清衷旌彼功
庸憶其姓字是頒慈旨俾勒瓊趺展一人特達之知固
千載爲儒之幸雖磨鉛而僅就顧刻鵠以非工重念臣
最處孤平加之拙直唯竭心而答祿恥令色以從人夙
夜端憂莫避入朝之嫉聖明大庇獨承如地之容敢不

倍勒箴銘更探油素誓畢蜂蟻之命仰鑄天地之仁

進謝恩物引表

臣某言伏以崇真齒胄雲構相望紀事披文天章益煥
典司知幸榮慶交深中謝恭惟尊位皇帝陛下天縱多
能通微作聖鴻猷備舉極孝奏之儀典學日彰布睿明
之德昨以欽崇祕錄肇建殊庭啟神麗之規旁臨東闕
奉馨香之薦仰佇左飈爰以賢王方從外傳肇堂皇而
密邇庶祉福之來同而皆躬運寶跼親裁宸制叙九清

之道蔭允罄於精衷稽三善之格言但馭於寶訓繼刊
金刻並建龜趺義舒之彩交暉咸韶之韻相入是知百
靈潛衛永鎮於皇居太一下觀將傳於紫筆臣仰逢亨
會早竊殊恩忝預攸司親逢能事雖乾坤惟大固無可
報之階而芹菽至微或盡告虔之懇兢惶抃蹈倍萬常
鈞

乞與修真宗實錄表

臣某言伏以緝熙盛節先聖之鴻徽紬繹信書孤臣之

舊職冀殫薄技少謝遺恩仰讀諒陰伏增震悸臣某誠
懇誠懼頓首頓首竊念臣材命竒薄門族悴寒頃事先
朝最承華寵對問軒陛擢自諸科第念庸微久陪法從
旋以上封納爵詣理代親事敢自明誼當引罪先皇帝
恫矜孝養昭式禮經抑去空文比用寬典裁令出守趣
使知非臣敢不夢寐惟憂夙宵咎痛使食當去亦冀改
爲儻心可銘不難自剋庶伸尺寸漸積歲年贖一青於
前辜答萬分於再造何圖憑几遽迫遺弓云補無辰攀

號罔極恭以真宗皇帝躬訓慈儉顯講藝文拓邃古之
皇衢剋叔世之霸軌澤浸九域雨潤而雲游威憚四夷
風翔而電照臨民先惻怛之吏防邊後忿鷙之臣恭默
道樞偃仆武節長養萬物休息羣生由是瑞命荐臻上
儀交舉紀姓垂鴻之典煥行於蒼珉候日疇聖之符充
溢於金匱仰對在天之烈莫先垂世之書必當遴簡時
材章叙實錄禮文至盛注記尤多誠須博集簡編廣分
卷第宜有冗吏以備後陳重念臣頃在往年常參史局

太祖皇帝大功美業幸預於編研太宗皇帝盛德嘉猷
繼叨於頌次成書未幾急景難留當時史官迭爲異物
唯臣與晁迥二人尚存臣雖出典五城連更六祀棄置
刀筆奔走泥塗溫故無由屬言多廢若乃先聖發明之
類例朝家經濟之規模靡敢暫忘粗能追憶儻使編聯
事實繫叙日時庶能上給英儒廣資鴻筆宣贊風美煥
燦古今式効涓誠仰酬餘烈伏望皇太后陛下布昭宸
鑒祇適詒謨哀報國之危衷委容輝之末照念臣先聖

寵綏之日振拔爲優皇帝潛躍之初遭逢最舊特垂開
可許以報投詎敢銜鬻非材微冀誤寵儻俯容於竭力
乞靡預於疇勞纔獲成編即求爲郡永罄樸忠之節仰
醕簡照之私

乞御製君臣事迹序表

臣某等言臣聞易象始備文王作乎繫辭典詰既刪宣
聖制其書序矧發揮於大典實繫賴於睿文將凜凝嚴
預增戰越臣某中謝伏惟皇帝陛下惟聰天縱將聖日

躋園範二儀博通於機會憲章六藝妙達於精微崇四
術以化人鑒百王而立制考藏書之閣墜簡咸收頒勸
學之言素風大洽頃以西清多暇乙夜無遺覽篆素之
前編見君臣之往躅絲綸悉紀懲勸罔分濬發宸衷誕
敷聖詔命近臣而紬繹選多士以刊修類聚羣分各從
於軌範彰善癉惡永別於否臧固懋德之洪規實經天
之至訓臣等誤膺甄擇俾預校讎雖抱槧和鉛共勤於
素業而兼條總貫動稟於睿謨至於衆議之未通舊文

之多誤損益之非當褒貶之失中皆自發明方成義例
顧屢遷於時序將甫就於編聯爲聖代之大謨垂千齡
之彝制竊惟序引實總淵源若冕之在躬爲服章之表
如蘭之抽緒開組織之端苟非睿辭豈容輕議其君臣
事迹伏乞聖慈特賜御製總序加於編首式昭下濟之
輝永播化成之教豈獨儒林之榮觀實爲聖域之令猷
願迴從欲之恩特允至誠之請

乞降御製御書於昭應宮表

臣某言竊以殊庭肇啟載嚴曲密之規上士咸臻未識
昭回之采合仰祈於帝製冀永暢於真風臣誠懇誠願
頓首頓首伏惟尊位皇帝陛下學本生知聖惟天縱布
安安之化率育於羣黎宣郁郁之文紹隆於先志而自
增高云岱報本河汾朝氣祖之晬儀歷省方之靖館感
鴻禧之茂委敷睿思以誕彰凡屬神明之區徧垂金玉
之刻至若頒宗範於藏書之閣紀元符於錫瑞之門刊
寶訓於東庠叙嘉猷於內府發慈悲之大願著告戒之

宸辭篇溢西清卷盈東壁固以發揮經教疏暢化源激
雅俗以還淳道懷生而底善況靈宮之既就繫羽服之
攸依苟共遂於瞻虔實倍增於榮慶伏望聖慈特賜御
製御書曾賜臣寮者各一本於玉清昭應宮集禧殿左
右鋪掛收掌許道衆觀仰是冀鈞天祕邃常聆九奏之
音紫府深沉永煥八龍之篆精虔懇至實倍常鈞

乞依諫官抗議表

臣某言伏奉聖慈賜臣詔書示諭爲諫官上言任福等

陷沒臣指蹤不明乞降官序朕方責以後功寢茲抗議
者偏師失律方沮軍聲祕檢延慈猶寬吏議感深淪髓
愧極無顏中謝伏念臣出自書生罔諳羌事誤填邊瑣
再從軍屯既陳力之不能屢上封而請代不圖宸造靡
訊無功俾旋關輔之故棲盡付邊防之重委主憂臣辱
在寢食以皆忘恩重命輕誓死生而必報以是經營戰
守約束偏裨令極五申心交萬慮適屬犬羊侵境貔虎
聚營十舍相遙雖指蹤之匪及一時極選顧授將以頗

精何期臨敵貪功無謀應變聽我鵠鶴稔茲豺狼職在
於臣咎將誰執爰露章而自劾祈麗事以繩違豈謂伏
遇尊位皇帝陛下深軫上仁恫矜舊物念臣本由誤選
察臣頗厲樸忠特輟簡書式垂詔諭抑諫垣之讜論寢
司敗之成科仰戴寵私交流愧汗餘生再造九殞莫酬
然臣嘗豫近司粗知前禮既有干於公議即難廢於常
刑當保邊捍寇之秋非屈法申恩之際而況軍行三載
日費萬金既未能逐敵踰沙又不能全師守律偶麾手

策畧挫羣兇過有若斯理宜無赦矧復士心未振兵勢
尚分逆黨益驕謀將全乏臣五能已竭十駕方疲將何
善後之機更總防秋之算實憂誤國非敢顧身願頌黜
罷之文免累安危之計又慮朝廷以臣職當引咎意在
辭難則街亭喪師孔明削其丞相西陵縱敵羊祜降爲
平南望舉舊章以澄不武侯成來效漸冀功除

明堂乞朝覲陪祀表

臣某言伏以皇王宗祀邦國之大猷陪祀致恭臣子之

榮願敢殫就望之歎仰祈照臨之私中謝伏念臣早以
諸生寢承顯遇之涓埃之微效冒文武之崇名連事兩
朝猥叨法從仰此緝熙之禮復遭親祀之期聆詔綍以
馳誠悵藩垣而繫迹阻肩鷺序獲奉天儀伏望尊位皇
帝陛下閔以衰遲矜其悞悞特頒開可之旨俾瞻稀濶
之容甫訖侍祠即時還任

代謝生辰禮物表

臣某言伏蒙聖慈特差某官某押賜臣生日禮物具謝

上表者鴻私俯逮蕃錫有加拜賜已還揣躬慙惕中謝
伏念臣叨承寶胄仰託皇闈早列郡封靡階功緒顧以
年方蒙稚性異溫文周寢問安徒謹雞鳴之候虞庠就
學未通背誦之規豈意宸衷曲記生日特令近職肅將
朝恩鈿器織文榮頒於御府兼衣駿駟寵集於藩房載
省無能曷勝慈獎此蓋伏遇尊位皇帝陛下欽延真蔭
允廸天門廼眷本枝務隆恩典九霄沆慶雖無報德之
階億載承顏但罄因心之禮周章感懼倍萬常鈞

代辭兼中書令表

臣某言伏奉制命特授臣某官者上儀交舉方畢於嚴
裡純錫誕均遽叨於茂渥省循所至震慄交深伏念臣
性異生知識慚幼悟但以早承慈獎昭啟郡封已視秩
於三階復兼勞於八舍加以七經初授方勵於愚衷百
行未彰動煩於聖訓豈謂此者國家奉天尊祖祇薦鴻
名類帝裡宗聿成大報祺祥方茂恩獎誤加進左相之
崇資廣爰田之食賦唯仰延於真蔭實俯媿於無功伏

望尊位皇帝陛下察以由衷軫其非據特頒朝旨追寢命書是則國體至公靡厚家人之愛材臣知勸免騰鄉校之言懇激周章期於得請

代謝兼中書令表

臣某言伏奉制命持授臣兼中書令加食邑一千戶食實封六百戶者精真降祐茂集於上儀蒙幼何功首均於大慶懇章繼上溫詔靡俞仍俾斷於來封難重煩於睿聽拜受祇竦榮懼交深中謝臣聞昔者順天以制官

信賞以懋德所以西臺之重觀象於紫微右相之尊比
崇於黃閣在於加邑亦用疇庸自非聞望素高親賢莫
貳舍中履潔積行累功則何以登翊大猷出納明命仰
惟亨會彌慎隆名如臣者性本顓蒙才非秀跼壽街著
群曾未顯於天資甲觀分榮徒早承於聖蔭由是升華
近衛列爵上公爰建節於近藩遂疏封於吉壤量能既
淺昧進尤多而況年甫勝衣禮方就學忠孝惟實初佩
於格言經籍是娛未通於臬旨此者伏遇國家講求鉅

典涓選靈辰鏤溫玉之祕文薦清都之丕號祇見祐室
拜況陽郊既舍爵以策勲遽出綸而錫命俾冠八貂之列
仍加五等之封真食兼增寵章尤茂竊自惟度深積覲
慙繼伏奏於公車願追還於恩制嘉言都穆游形敷諭
之私渥澤頻繁莫寢已行之命黽勉祇荷啟處無從此
蓋尊位皇帝陛下茂擁天祺博延道蔭寵帝光之寶緒
豐膝下之深仁是推不次之恩用表曲成之造敢不勵
誠夙夜遜志詩書鳴玉內朝永奉問安之禮永顏幄坐

更勤侍膳之心庶漸稱於慈衷用仰疇於宸造感抃之
至倍萬常鈞

上謝恩物引表

臣某言伏奉制命特授臣某官者恩典有加拜受祇慄
伏念臣仰承國慶幸託天枝爰在幼齡夙塵隆寵今者
猥蒙朝命特啟郡封進秩近司肇頒於美號兼榮右相
仍廣於爰田退省何功實繁鴻蔭此蓋尊位皇帝陛下
高明垂裕右饗延恩允彰宣哲之靈丕顯在天之德務

克昌於聖緒用誕降於多祥是致童蒙昧茲優渥唯當
率遵方穀恭載宸慈詔厥之謀敢忘於對越聿懷之福
更賴於寵綏祇報之儀具陳別奏周章懇激倍萬常鈞

代賀水清木連理表

妾言今月某日伏觀後苑奏有兩處水清木各連理者
鳴鸞展采瑞木聯芳仰觀孕禧俯增大慶妾中謝竊以
象輿載育表異於天資平露惟喬效祥於國政蓋德風
之醇暢致神物之蕃淵況在平柯尤彰美應伏惟尊位

皇帝陛下紹宣鴻烈懋建遠圖天人之際已交禁園之芳挺異雲枝內附茂昭混一之符華晷載陽式協中和之德煥珍圖而有耀宣景鑠以無疆妾限守宮闈莫陪警蹕仰明休之允穆增率舞以攸深

接駕謝撫問表

妾言今日日某人至伏蒙聖慈特賜傳宣撫問者星輶爰降絲旨旋頒仰戴鴻慈俯增丹懇伏念妾獲塵中壺幸會昌期屬法駕之省方已回鑾而復路爰趨近甸恭

候先驅遽承郁穆之言俯諭眷懷之意荷恩榮而有耀
疇覆育以無階

第二表

妾言星使俯臨絲言載諭祇膺睿造俯積丹誠伏念某
幸托宸闈仰逢亨會屬真區之巡祀詔法御以言旋爰
詣近畿恭迎制蹕遽被出綸之旨俯推乃眷之恩荷慈
渥以何勝顧兢惶而靡措

謝進奉回詔表

妾言伏蒙聖慈以妾所進特賜詔諭者皇明通燭帝緯
垂文祇捧已還兢榮失措伏惟尊位皇帝陛下寅威瑞
命顧謨靈謀言瞻景毫之區式效襄城之駕齋心靖館
方非食以矜莊薦鬯嘉壇將迎真而展寀妾限居椒掖
莫奉玉盞虔脩貢獻之儀仰瀆鴻明之德遽奉發中之
詔茂宣逮下之慈顧曷稱於褒優但俯增於戰越

楚王謝恩表

奉勅
撰

臣某言伏奉制恩特受臣天策上將軍行興元牧賜劍

履上殿書詔不名依前守太師尚書令依舊在宅養疾
餘如故者恩制誡宣徽章載峻仰戴加崇之典俯懷非
據之慙臣聞隆器大名必先於有德殊榮異數豈及於
無功如臣者託體宗枝承暉寶萼之間平之令譽異周
召之元勲位冠中臺任隆西省總鈎陳之近衛分列軫
之奧區禮徒厚於朕膳效罔階於塵霧唯賴寵私大庇
友愛曲成宴處安安俾階於養素夙興翼翼莫展於在
公常自省循尤爲冒昧豈謂伏遇尊號皇帝陛下德綏

九族惠育羣黎誼常切於展親化方深於教睦繼先猷
之久大丕顯於孝思紹真緒之延鴻務均於道蔭式稽
良日爰賜命書備褒寵之殊猷極優隆之貴範葭莩至
薄荷敦叙以何勝麟趾實繁顧徽榮而特異未遂內朝
之禮但銜右戚之仁感抃兢榮倍萬倫等



文莊集卷九

欽定四庫全書

集部

文莊集卷十二

十至

詳校官監察御史_臣李陽樾

檢討_臣何思鈞覆勘

謄錄監生_臣嵇承羣

謄錄監生_臣吳壽康

謄錄監生_臣張曾壇

欽定四庫全書

文莊集卷十

宋 夏竦 撰

表

代王文正相公辭司空第一表

真館告成方臻於吉日慶霄垂渥首及於具臣慙震所
深周章失次臣某中謝竊以宏父之職邦土是司任惟
其人固難求備坐而論道是謂無官自非宣清重之風
茂冲粹之德將何以會通九澤監總百工備四近之班

應三階之曜如臣者材質庸菲性識顛蒙禁省代言微
深厚之體近司聞政乏康濟之謀徒以叨逢聖明過賜
丹采巖廊充位華貂有不足之譏武帳承顏前箸無可
籌之事至若慎徽五典懷柔四夷率育黎蒸簡清流品
封崇於恒岱奠瘞於河汾緘祕刻以朝元展欽柴而拜
况宣明禮樂之制布昭巡靖之儀惟仰奉於成謨莫少
陳於末議洎載均諸賞典常首冒於徽章維石巖巖莫
允具瞻之望伐檀坎坎但增素食之譏昨者國家祇若

靈猷欽崇祕宇觀紫微之法象倂曲密之威神官有居
方蓋動遵於精意事無愆素則自屬於攸司而臣上領
使名本無職局未嘗面勢親總工庸唯奏格於馨香自
肅祇於齋潔豈謂慶成之日首叨非次之恩俾正位於
公槐極加崇於鼎席況冬卿之望古制攸難本非虛受
之資豈是徼榮之地重念臣聲猷寢昧齒髮甚衰師長
朝猷歲時滋久忝居揆務命數非輕尸厚祿以尤多妨
賢路而斯甚早欲露章車府延首帝闕願避寵私用全

散拙屬敦仁之俯逮實布欸之未遑豈可更竊茂恩游
居隆器縱人言之靡畏抑自訟以何安苟昧進以無厭
必惡盈而有咎循牆偃僂跼地怔忡伏望陛下深測上
仁俯矜丹懇特寢出綸之命俾寬據蒺之憂如此則求
賢審官靡替及功之賞陳力就列式敦知止之風誓更
竭於涓誠用仰疇於大庇兢惶隕越得請是期

辭司空第二表

國恩非據天聽蓋高既未賜於允俞但俯增於惴慄臣

某中謝竊以三公之任庶政是維燮順天和登翊王度
所以無人則闕有德乃堪况惟度地之資尤重經邦之
寄舜咨伯禹始別九州之封魯任宣尼爰分五土之物
逮茲以降厥制彌艱或寵重於茂勲或旌明於懿行未
有不階人望誤被朝章儻成虛授之私實損至公之道
如臣者素無微效幸遇昌期陟降凝嚴周旋機近熙帝
之載既乏於訏謨為儒之榮又踰於素望不能早避賢
路博衍時材荷大庇以雖深顧傷廉之已甚豈可不能

早避更竊微榮況琳宮揆日之初梓匠飭材之際上則蒙成於聖慮次則專達於攸司臣有何功豫茲懋賞苟廟堂之位可以假人則軒冕之恩不足勸下將何以表儀羣后弼予一人

代寇相公謝恩表

臣某言今月一日伏蒙聖慈賜臣官誥一通勅牒一道特授臣前件官者睿造曲成寵章有異載循淺拙不任兢惶伏念臣本以庸材叨逢慶會詎詒人望誤簡帝心

自忝昧於慈榮實頻繁於要近既靡揚於吏職固遑卹
於人言豈謂伏蒙尊位皇帝陛下俯念顓愚曲推恩庇
授之節制斷自宸衷矧視秩於公槐抑兼營於台鼎雖
竭心而有素實報德以無階唯更誓於夙宵冀少酬於
臨照

又謝恩表

臣某言奉符仁里式罄於精衷徹饌真場爰及於大慶
播鴻徽之允穆介蕃祉之無疆降及萌生率同抃蹈中

謝竊以混元無象判渙於二儀冲用自然周流於萬化
洪惟教父肇啓真源強分太上之名茂洽有常之德唯
降臨之勝地有祈福之嚴祠漢崇文石之壇靡昭於儉
素唐制金蓮之舞詎極於誠明允屬昌辰式揚茂典恭
惟尊位皇帝陛下睿明攸縱恭儉式孚祖武宗文昭宣
於馨烈尊道貴德懋建於大猷受綠字之元符集紫清
之景祐勒封云岱則瑞氣成宮展宸河汾而祥光燭地
遽感通於宵寤爰降格於仙游昭長發之鴻源諭聿懷

之密命上仁愈洽盛事彌敷乃眷靈區俯俞勤請命攸
司而經始酌洪典以時中神物嘉生溢珍圖而繼至殊
庭大室陳告禮而啟行羣后奉儀寶文先道積明誠於
京闕宣睿作於洞章爰協靈辰首登徽冊百司定列肅
陳薦鬯之儀九奏成文亟備升煙之禮凝蹕於省方之
館受釐於頌瑞之庭萬寓駿奔百靈交慶英聲無已騰
懿鑠於九圍道蔭彌隆庇羣生於億載叨分留事幸奉
嚴禋仰丁襲吉之辰共積逢時之幸欣榮抃蹈倍百常

鈞

代寇相公辭官表

雲雷之澤曲播於慶霄旌榮之榮誤加於瑣質揣循斯
至祇受誠難臣某誠榮誠感頓首頓首伏念臣本以諸
生誤階榮次荷先朝之振擢叅近職以頻繁罔知退食
之規徒益在梁之刺洎偶繼明之際過聽圖任之私召
自藩垣俾釐京室方總貨泉之職遽叨鈞鼎之榮爰外
布於郡條亟入司於畱籥逢辰之幸曠世難名其如家

世素微年華漸暮雖竭當官之節終無報國之階況會
府分曹已漸於八座陪京出守止望於一麾過蒙帝造
之曲成叨踐樞庭而承乏奉行成算循舉舊章絕無廣
盛之謨但積祗膺之懼豈謂伏遇皇帝陛下矜其不逮
恕以無他特垂踰望之恩用示簡心之澤聞命之始跼
地無從況文武聯榮人臣極致惟聖朝之三葉符茂典
者二人趙普以佐命元勲方兼於將相李至以攀龍舊
德止擁於旌旄臣也何功妄階茲寵縱造化獨私於淺

拙而鬼神必害於滿盈仰承保庇之仁但銘於骨髓退
思止足之戒實悸於肺懷伏望聖慈俯矜丹懇復七兵
之舊列寢六蠹之殊恩儻得束帶金閨紆紳丹陛再拂
桑榆之景重親日月之光更厲夙宵虔服資忠之訓庶
俾塵霧仰酬任舊之仁

代冠相公謝詔允百官國學觀先皇御書表

臣某言睿辭從欲溫詔曰俞祇誦已還兢榮交集中謝
伏惟尊位皇帝陛下寶慈宣化克已敦仁翼翼因心茂

著聿追之孜孜典學誕隆載郁之文式眷虞庠肇營
軒閣闕先朝之睿迹緘以金縢昭善繼之聖謨垂之玉
刻俾多方之仰視彰累盛之流徽臣等謬籍金閨未趨
璧水爰祇章而列奏願澡雪以榮觀遽承出綽之言特
允叩門之請交趨動色覩能事而有期誓節盟心報鴻
私而無地兢惶感忭倍萬常鈞

代冠相公謝賜還京詩表

臣某言福壤還衡式臻於中禁薰風流韻爰播於永言

叨仰止以為榮顧乃賡而增愧中謝伏惟尊位皇帝陛下寬仁逮下寅畏時中顧謐明威紹揚先烈自欽承於道誨彌昭事於真源奉綠錯之符虔趨於仁里奏紫極之舞順拜於清壇膺介祉而有融霈鴻慈而允洽亟回興於近甸既飲至於太宮陽位欽柴將修於大報睿文章漢遽發於英聲被六樂以和同鑠三辰而均麗暢聿懷之景命昭有翼之精衷臣幸遘昌期獲頌聖藻藏家傳寶顧圭竇以增輝稽首颺言撫么絃而積媿仰塵聽

覽伏切兢惶

謝宣示綿州進彰明縣崇仙觀栢木文彩像道士七星儀形表

臣某言今月十日宗政殿伏蒙聖慈宣示綿州所進彰明縣崇仙觀栢木柱上有文彩像道士形儀分明可高七尺兼北斗一座者美材薦祉靈像成文祇覲以還慶榮交至中謝伏惟尊位皇帝陛下紹隆先志懋建民中罄寅畏以禮神保惠和而育物皇圖候日丕顯于鴻猷

真祖在天誕彰於道蔭播三儀之善氣騰萬物之嘉祥
矧彼左繇素嚴祕宇惟丹楹之有覺挺堅栢以含章久
佇昌辰適彰瑞理上儼靈仙之體旁分斗極之形審諦
無差周旋悉備清衷載考協開元至盛之符羣后仰瞻
實治世無彊之應臣等濫塵樞近獲邁珍祺忭蹈之誠
倍萬倫品

代寇相公進和御製升祔詩表

臣某言伏以清廟肅雍既嚴於尊祔薰弦和雅遽播於

聲詩叨拜賜以知榮預颺言而匪稱載循淺昧伏積震
惶中謝竊以周美太任聿著思齊之頌魯尊先妣爰歌
有恤之章盖昭布於信辭用形容於盛德伏惟尊位皇
帝陛下寅威景命嗣服慶基誕彰錫類之仁務極顯親
之禮近以欽崇先后稽考舊章恭升帝母之尊祇侑神
宗之室揆休成而允協薦裡潔以惟馨虔敷章漢之文
茂述因心之道克諧以孝昭虞舜之大猷煥乎有文宣
陶唐之懿德臣幸鍾運會素乏藝文載賡郁穆之音彌

顯湑堙之累仰塵聽覽尤切兢慚

代丁相公賀元德皇后祔廟禮畢表

臣某言鴻儀茂舉至孝允孚凡在照臨咸同慶忭中謝
臣聞魯尊先妣姜嫄始立于閼宮唐重母儀昭后終遷
于太室徽音匪遠彝制具存恭以元德皇后作合先朝
誕生上聖自別崇于廟享庸未極于禮章伏惟尊位皇
帝陛下錫類推仁追恩著德體周文之翼翼極虞舜之
烝烝仰惟帝母之尊虔納輔臣之議用欽崇于尊謚恭

升配于神宗涓選靈辰宣臻熙事百官承式奉徽冊以
惟寅萬世不祧致明裡而永穆丕顯奉先之禮茂昭維
則之思先置真祠仰聞大慶趨闕庭而靡及增蹈頌以
攸深

代集賢相公辭官第一表

臣某言真馭下臨式均於大賚寵光遐被首及於具臣
退省何功實為非據臣某竊以漢宗特進實寵於勲賢
魏重右曹用司於樞要典章所載名器甚隆允屬昌辰

尤為大任苟乏當仁之譽必貽虛授之譏如臣者望實
非優藝文素淺當先朝之政治誤膺東拔之私遇上聖
之繼明曲荷眷懷之造周全宥密叅預彌綸唯仰稟於
睿謨莫少裨於帝載爰保釐於洛邑游居守於神臯曾
微扈從之勤再奉疇咨之命鴻鈞播物但繫天地之仁
神鼎調元莫適鹽梅之用昧進固踰於涯分省躬每懼
於顛躋此者伏遇皇帝陛下奉若景靈祗明妙化感上
真之報降昭帝緒之綿長茂對皇穹既嚴於禋饗誕敷

慶渥亟及於近司進二品之崇階正三臺之峻秩乃加
并賦併示寵章雖堂陞惟隆務推於優裕顧斗筭至小
必至於滿盈湏傾若厲之誠仰瀆蓋高之聽伏望陛下
俯矜短拙曲示保全濬發宸慈俾收成命如此則公朝
之典克叶於無私鄉校之言免譏於不稱仰干旒宸得
請為期

第二表

臣某言寵私非據誠請未俞載自省循彌增隕越臣某

竊以受爵不讓賢哲之深譏無德而貪典章之明戒矧躍池峻秩執璧崇階實真相之華資固公槐之異數自非勲懿曷副疇咨如臣者素乏藝能誤膺眷倚裁成庶政但傾將順之誠弼亮大猷莫著彌綸之議唯以幸逢期運頻歷歲年仰膺圖任之私不責謨明之効素飡多媿難逃冒忝之譏榮路久妨每積滿盈之懼此者伏遇皇帝陛下齋心體道恭己節神居蠖濩以儲精宅希微而觀妙存膺秘錄交舉鴻儀遠至邇安惠和胥洽天明

地察報降日彰感真馭之俯臨諭仙源之邃遠克昌厥
後茂奉於景靈永錫無疆誕膺於純嘏式均異寵首被
台司右曹之任尤崇特進之名至重益爰田之公賦皆
推德之徽章聞命益驚循牆失措遽傾懇悃固避恩榮
而睿聽蓋高未收於渙汗危誠益厲彌積於怔忡苟昧
進而自安必曠官而罹咎况屢干於聽覽期特賜於允
俞伏望陛下深測上仁曲回久照追寢出綸之命俾寬
跼地之憂如此則求賢審官式叶無私之化陳力就列

免增有覲之慚干犯宸嚴期於得請

代樞密相公辭官第一表

臣某言真祖肇臨茂昭於純錫寵靈爰被首及於近司
退省踰涯罔知攸措臣某竊以漢宗掌武之秩實典於
樞衡唐設褒功之名用優於勲績矧主田之厚賦皆懋
德之徽章允屬昌辰尤為異數功庸夙著聞望素高式
副僉同仰膺眷倚如臣者藝文淺陋胄緒單平始登射
鵠之科止竊代耕之祿振纓幕府結綬蘭臺夙宵靡造

於官箴尸素遽通於閨籍爰遇繼明之運首膺下濟之
仁踐清切之要司厯凝嚴之近省發揮帝誥莫暢於鴻
猷參貳台衡蔑聞於善政固民瞻之匪遯惟聖造之曲
全載塵侍從之資遽總樞機之務屬元符申錫茂禮交
修奉先置以何功贊上儀而非允暨荐敷於大慶皆首
竊於殊恩憂媿彌深寵光繼及遽升榮於鼎席復正職
於樞庭責實循名固昧和羹之望致遠任重方深顛躋
之憂此者伏遇皇帝陛下惠迪先猷寅威神化自欽承

於寶錄彌尊奉於景靈守慈儉而化人宅中庸而體道
皇穹是輔密命有開始宵寤以符通逮真游而報降簡
冊虔尊於徽謚羽髦祇告於太宮欽修茂對之儀用極
齊民之意就陽升燎誕受於繁禧逮下均恩首覃於瑣
質進台極三公之位兼加懿號之榮益井田五等之封
仍增真食之數寵私繁縟進退周章無德而貪詩人之
刺斯見知止不殆道家之戒甚明苟昧進而自安必曠
官而負愧上累知臣之鑒下貽覆餗之虞須瀝丹誠仰

煩宸聽伏望陛下曲回久照深測上仁俯矜益厲之誠
追寢已行之命如此則公朝賞典克叶於程材鄉校多
言罷譏於竊位上干旒宸得請是期

代東樞相公辭加恩第二表

寵靈非據誠請未俞循省已還周章失次中謝竊以知
止不殆道家之戒甚明以榮為憂先哲之規可覽伏况
臣自叨慎簡尤乏訐謨待罪樞庭莫裁成於大政兼榮
宰府已臻極於隆名屢省妨賢常虞瞰室此者伏遇皇

帝陛下欽承道誨祇通靈心效駕真區薦明馨而有翼
奉符泰時嚴陟配以惟寅臣叨贊鴻儀靡詳盛節屬均
恩之云始膺懋賞以覓殊進公府之崇階廣爰田之厚
賦聞命而震惶靡措循涯而盈滿是虞爰漑肺肝仰聞
疏纘若屬之誠徒切蓋高之聽未迴湏再瀆於凝嚴期
稍安於隕越伏望陛下俯矜短拙過視保全特推從欲
之仁俾寢已行之制是則多言可畏免騰虛受之譏信
賞無私允叶至公之道戰兢懇到得請是期

謝加恩表

臣某言泰時欽柴式推於茂渥公車奏牘爰錫於徽章
遽荷宸慈俯頒優詔既靡俞於懇悃難再瀆於凝嚴祇
荷寵私伏增榮感中謝伏念臣文非近雅材不逮人幸
會鴻名謬階通顯紫宸揮翰莫宣暢於大猷會府寵材
止奉行於舊典而屬皇穹降鑒景命肇新昭事景靈叨
榮於恭館交修盛節獲侍於寶文顧庸昧之無能辱眷
懷之特異振纓東掖始均夜拜之榮結綬中臺忽貳春

官之職洎真游降格睿志寅威貢九牧之良金範三清之粹象導迎將命方體於精衷振拔踰涯俄參於庶政顧乃版圖之秩愈增淵谷之憂昨者景亳朝元園壇報本叨戒先於備物既肅奉於明禋曠怠是虞啟居增惕豈謂上仁攸惻賞典斯隆賜八柱之貴勲進三品之崇級上公列爵仍加凌閣之名真戶益封兼廣爰田之賦念非才之最甚於憑懇以尤深顧渙汗之難收但怔忡而祇受陳力就列益媿於滿盈以榮為憂彌增於隕越

此蓋皇帝陛下責非求備道在包荒觀堂陞之言用優
於近列播乾坤之德務洽於純禧唯當退自揣循進思
刻勵詠伐檀之叶已媿於無功歌天保之章敢忘於報
上誓傾勤拙少荅照臨

代東樞相公謝授官表

臣某言飈歛降真式均於大慶絲綸示寵併集於微軀
爰揣分以增憂繼削章而憑懇洊荷聖明之詔靡俞遜
避之誠難屢瀆於惟聰但俯增於有覲僬倖祇受以榮

為憂臣竊以秦官掌武之司式總王旅唐制懋功之號
寔寵勲臣矧加地之徽章皆疇庸之茂典自非澡行浴
德履潔含忠績簡帝心聲敷物聽則何以仰膺眷待允
副僉同如臣者材實非竒行能無算寡庠序雍容之譽
乏丘園潔素之姿徒雕飾於庸頑誤陞攀於仕進當先
皇之求治在小善之咸收及擢臂辭場始奉命鄉之薦
比肩名路游塵入幕之資固婉畫以無聞但食貧而自
守豈謂誤承陟詔擢典秘文亟臨闕市之司甚曠征屢

之職屬大明之繼照均茂渥以旁流遂通籍於朝閨仍
效官於會府體寬大之詔敢議於煩苛陳蠲復之科過
叨於獎與始預七人之列俄居四近之榮丹筆詳刑固
平反而寡要紫宸搗翰寔潤色以無聞但自結於聖心
旋陞榮於內禁金鑾夜召恭奉於威顏玉壘晨征遽銜
於睿旨既撫安於瘵俗式宣暢於仁恩忽膺乘駟之趨
俾貳秉鈞之烈巖廊建議莫裨贊於大猷邊圉折衝詎
澄清於遠畧無勞被遇自訟增慚既騰不稱之譏益賴

曲全之德遷內殿優游之職冠近臣侍從之班寢食圖書方思於肄習總釐樞軸忽荷於倚毗屬三邊徹警之時是萬國同文之日循舊章而進秩無所建明緊睿算以蒙成但知將順屬元符之申錫惟密命之有開克昭右席之靈將展合祛之禮亟司先置於備物以何功首奉殊恩在策勲而加等矧梁陰之降禪報厚地以增基猥奉睿慈曲揚茂實莫極形容之妙洵叨優渥之私暨巡祭於魏雎復欽修於漢祀贊鴻儀而非允錫異數以

彌隆載惟班瑞之壇謬奉肆朝之禮復承優假曲被寵
光雖盛節紛綸務洽龐鴻之慶而寵靈繁縟益增冒忝
之憂方多愧於非材復誤膺於爰立樞廷正職詎宣宥
密之謀帝傳叨榮徒玷論思之任雖宸衷之靡替在興
誦以彌喧維石巖巖莫允具瞻之望伐檀坎坎但增尸
祿之譏昧進居多食浮滋久此者伏遇皇帝陛下祇明
至化恢大慶基宏亮嘉謨翕純而克裕紹休先烈烏奕
以垂鴻寶慈儉以化人宅粹和而觀妙無思不服誕宣

清淨之風有感遂通昭合希微之道酌中庸而立德守
淵默以儲精馨烈升聞皇穹降鑒感仙游之昭假彰聖
緒之悠長誕膺永錫之祥丕顯克昌之祐祇嚴簡冊既
薦於尊稱焜燿樵蒸爰修於盛典式覃榮渥首及具臣
進秩三階錫美名而益茂增封五等加公賦以尤豐載
自循涯豈遑聞命况振景拔迹在超越以難階苟損實
虧名必滿盈而易覆顧不能而將止况自見之甚明遂
稽周任之言亟效范丹之節雖怔忡失措繼傾若屬之

心而渙汗難收莫寢已行之詔但周章而祇荷固隕越
以無從此蓋陛下欽奉景靈誕均純錫特掩妨賢之咎
益推注意之仁敢不刻鏤肺懷揣摩鉉鈍竭心官次庶
逃竊位之虞勵節朝端免負知臣之鑒少輸勤拙上荅
照臨

代東樞謝賜宴并御詩表

臣某言泰時慶成方均於渙渥薰弦濬發爰播於聲詩
叨拜賜以知榮顧颺言而靡稱中謝伏惟尊位皇帝陛

下順承天則懋建民中包舉藝文化成於綿寓肅恭祭
祀誕受於蕃禧近者祇祓齋輿朝修真館奉蘿圖而展
案藏金刻以著誠爰飲至於帝居遽涓辰於郊報園壇
備物奉二后以侑神紫幄受釐眷萬區而均祐仰體需
雲之象俯推湛露之恩玉笋芳醪合多歡之允穆栢梁
高韻宣介祉之無彊函四始以飛英協六同而振律緝
熙王度煥衍帝謨臣等謬備樞機親逢旦暮章天睿藻
幸傳寶於私門堙耳庸音媿賡歌於聖域共循蕪累預

積兢慚

代東樞相公謝生辰禮衣器幣鞍馬表

臣某言寵私俯被榮錫有加拜賜已還揣躬增惕中謝
伏念臣聲猷素淺器識非長幸會亨嘉遇承甄獎奉樞
機之密命參鼎鼐之崇名循舉舊章莫建將明之議蒙
成睿算但增忝昧之憂豈謂宸衷俯記生日特令賤息
肅將朝恩駿驟兼衣榮增於瑣質織文鈿器慶集於私
門載念無能尤增內訟茲益伏遇尊位皇帝陛下法天

垂覆體道延慈式眷近司務推優渥功微賞厚固無可報之階恩重命輕唯勵自公之節兢惶感懼倍百常鈞

謝賜地宅表

臣某言皇慈振惠夏屋定居仰戴恩私伏增隕越中謝竊以齊招賢士宅於康莊之衢漢寵列侯賜之甲乙之第蓋國家之茂典寔臣子之殊榮伏念臣世緒單平藝能淺拙豈謂聖明過聽簡拔踰涯待罪樞庭俾虛於官謗兼榮鼎席莫允於民瞻頃者初玷朝闥肇營私第前

瞻太室密邇閼宮常戒前驅靡容呵止然尚憂於囂雜
或有瀆於靖淵加以寒族漸多聚居頗窄屬導河而環
水洎倚城而建門仰昭事之載嚴彌退思而增惕將懇
求於更次遂載免於凝旒曲承造化之仁俯遂萌生之
欲特頒爽塏仍俾修營自顧何功重勞庶役矧屢煩於
睿旨命催督於攸司曾未踰年於茲成室率六親而樂
止展四體以安居面大道以甚崇近北闕而知寵邊陲
無事雖慚去疾之辭退避未遑猥奉五倫之賜敢不夙

宵誓志啟處懷恩永輸螻蟻之誠上報乾坤之施

大莊集卷十

欽定四庫全書

文莊集卷十一

宋 夏竦 撰

表

代宰相謝加食邑表

臣某言褒司進秩實駭於輿情車府露章莫面於成命
拜受祇竦凌兢失圖中謝竊以昔建地官實司邦教商
周之際或在於元卿漢魏以還頗居於三事倡導九牧
安協兆人古之多材尚不求備況臣人品庸菲世緒單

平不意逢辰遂踰始望禁林贊畫微深厚之訓辭樞府
備員乏懷柔之上畧而自忝承四近師長百工贊相盛
儀布宣能事奉行睿旨既昧於將明循舉舊章抑多於
忘誤雖曲成於大庇終莫允於羣瞻乃者祇奉絲言總
司金匱約編年之舊體頌先聖之鴻徽廣記備言並資
於羣士無條總貫皆稟於孝思臣有何功成茲大法豈
謂誤膺賞典遽忝從臣載益爰田仍加真食外廷誕告
有位震驚誠以名器隆高非假人之物年華遲暮豈昧

進之時縱靡卹於羣言亦何安於心由繇是懇陳奏牘
願寢異恩渙汗難收懼重煩於睿聽凌兢載省實交悸
於營魂此蓋伏遇尊位皇帝陛下尊寵時文褒優近列
對越祖宗之德鋪觀堂陛之言是敦圖任之仁靡責當
官之效地崇禮絕既有醜以徵榮恩重命輕愈無階而
報國但誓桑榆之景仰疇天地之私

代僕射相公謝宣賜藥表

臣某言伏蒙聖慈賜臣抱龍丸解毒丸厭熱解躁金露

九蘇合大丸白散子共一合者星使俄臨天言誕布靈藥爰頒於三品微軀曷戴於鴻慈捧受兢榮罔知裁處竊以元霜絳雪紀漢武之幽經五色一九著魏文之嘉詠諒匪仙風特秀冲氣惟和則何以分金竈之刀圭減青囊之銖兩如臣者性惟至懵知不及中飲水雖欲於自清負薪素惟於多病萬幾之務祇稟於睿明四體之勤實慙於疏緩伏惟尊位皇帝陛下淵通妙用啓迪休祥推神農嘗藥之仁布武王陰樾之惠曲回久照優寵

近司屬茲清暑之餘慮鮮攝生之術九籥之丹甚秘太
一之散惟神載加亭育之私併示便蕃之錫玉音是諭
溫純深厚以何勝寶劑初開郁烈光輝而盡在仰聖人
之修練辨太醫之苦良珠顆累累配合歡而蠲忿玉座
皎皎泛華液以安邪豈唯去瘵以滌煩將俾輕身而難
老臣以謬承任遇殊乏彌綸荷子貺之斯來實亨嘉之
攸會策疲驚而自勵顧涓勺以何施慎守靖恭敢忘報
効

謝賜藥表

臣某言欽膺睿旨佇詣於真區祇荷鴻私特頒於妙藥
兢榮併集啓處不遑中謝伏惟尊位皇帝陛下慈惠臨
人寅威順則受皇穹之密命集帝者之上儀式眷魯邦
實惟福壤紀始祖降靈之迹建黎元祈福之宮侔曲密
之威神方嚴於胥宇致中宸之精意將達於惟馨臣猥
奉疇咨俾承裡薦實退憂於庸拙莫上體於齋明爰從
受命之初以及治裝之際過承臨照盡燭幽微顧優假

之踰涯方怔忡而靡措豈謂宸慈逮下寵賜游臨絳雪
靈腴極太醫之上品良金鈿器兼內府之奇珍載循臣
子之微生曷報君親之厚意唯誓增於勤瘁用仰副於
欽崇感懼周章倍萬常等

代僕射相公辭加恩第二表

寵私非據爰貢於露章宸聽蓋高未收於出綍揣躬內
訟跼地端憂中謝竊以漢聲儀司任隆於元老魏崇開
府寵茂於勲賢洎食采之增封並疇庸之異數自非協

宣庶績登翼遠圖厥有大勞靡符公議如臣者幸逢運
會濫預官常本無異衆之材止竊代耕之祿豈謂聖明
過聽簡拔踰涯用師長於百工俾陶甄於至化蒙成帝
力雖靡責於謨明遑卹人言常動貽於官謗此者伏遇
皇帝陛下寅威道誨包舉禮文曲里朝真詔百靈而奉
蹕園壇報本尊二后以侑神洽大賚於中區峻寵章於
近列顧何功而受賞難昧進以徵榮況臣執秩崇階器
名已重爰加厚賦封食尤多屢省無能方圖避位豈可

更貪渥綬自速滿盈爰稽錫爵之文願寢自天之命遽
膺尺詔未允寸誠須繼續於惟聰冀稍寬於若厲伏望
陛下曲成垂裕從欲推仁申飭攸司追還恩制是則臣
無虛受式敷止足之風賞不失勞永叶中庸之道周章
懇到得請是期

中書乞免和御製述懷詩表

臣某言宸章寡和繼瀝於懇誠睿聽蓋高未頒於俞旨
載循淺拙彌積兢惶中謝竊以虞舜股肱之歌纔盈數

句漢皇日月之唱止及七言故士師拜手而乃賡羣后
登臺而奉詔若乃聖辭玉振睿思淵冲溢鴻藻於縑緡
宣大猷於風雅蓋天資之有素固臣和之無階伏惟尊
位皇帝陛下盛德惟新多能攸縱奉先成裕儀孝奏於
皇穹典學宣精懿文明於聖域矧屬清閒之宴誕彰雅
正之音述帝迹之肇基叙真游之降統祖功宗德敷混
一之英聲帝錄皇圖迪重熙之景命至若合祛魯嶽巡
察魏雎延颺駕於中宸薦令芳於曲里商丘經邑昭紀

於詒謀陽位欽柴祇嚴於陟配敷宣悉備包舉咸周陳
王業則七月之章告成功則清廟之什載行事則二帝
之典記禮容則三代之文理絕名言事超象繫爰私傳
密俾預賡颺臣等幸會貴嘉謬塵倚注覩流暉於雲漢
已極殊榮繼絕倡於陽春豈容輕議況惟頑陋並乏藝
能披滕而媿汗交流承命而營魂散越爰懇祈於矜免
終未賜於允俞若寶句非多稍知於睿式則蕪音是竭
仰副於清衷蓋以縟彩星繁嘉言天遠韻金相而累百

畫鉤婉而且千捧閱而涉海無津祇誦而崇朝未徧冠
古今而夔出與造化以相侔六樂均和豈待么弦之嗣
響三辰宣麗顧容燭火之沈熒庶少息於周章用曲全
於蚩鄙扣闥瀝懇得請是期

樞密院乞免和御製述懷詩表

竇思淵冲嘉言天遠仰聖謨之攸縱固臣和之無階聞
命已還周章失措伏惟皇帝陛下欽明順則濬哲宣英
考古道以建中觀人文而化下屬垂衣之無事惟典學

以游心式運寶附裁成睿倡序開先之密命昭丕變之
鴻基二后在天播太寧之鴻烈三靈錫祉宣善繼之大
猷若乃雲岱勒封河汾展窠奉元真於秘殿陳嘉薦於
名區畫千里之畿紀興王之奧壤奏九成之舞拜靈眈
於嘉壇經緯無該廣大悉備布昭事實坦然堯舜之書
丕顯形容穆若商周之頌總百王之能事流億載之英
聲爰出示於樞司俾仰賡於帝製伏念臣等遭逢有素
諷賦非工雖久奉於文思終莫移於頑陋况震雷之飛

金匱要略卷十一
響固衆籟之銷聲豈容燭火之輝更續太陽之耀敢期
宸造俯惻非才曲示保全特垂矜免庶靡彰於蚩鄙用
少息於兢惶誓堅盡瘁之誠仰答包荒之德

宮使乞降御製御書表

臣某等言伏以西崑之府實祕於帝文小有之天或藏
於龍篆惟密都之肇啓而睿製之未頒敢俯罄於虔祈
庶永諧於傳寶臣中謝伏惟皇帝陛下繹清心照濬發
天資典六學以宣英總三才而觀典爰自奉符梁趾瘞

玉郊丘按金輅以省方詣殊庭而尊道歷上儀而悉叙
鋪往烈以咸觀煥衍蒼崖馨香翠琬以至誕敷瑞命挺
紀先謨著論辯之格言發慈悲之大願或冠篇於藝圃
或度曲於薰弦橫汾水以搞辭坐栢梁而傳唱青絳屢
溢藥簡常盈名以萬殊蓋百王之能事理惟一貫乃五
教之彛倫固已包舉國章發揮政本勉諭勤請嘗下濟
於私門敦勵時風已載刊於東序宣琳宮之允備而鳳
蘊之未藏式揆羣心尤為闕典伏望聖慈特賜御製御

書應曾出賜臣寮者各一本於玉清昭應宮集禧殿左
右嚴密收掌許道衆觀仰今後御製並乞降一本令本
宮編次是冀敷宣茂實演暢真詮游鈞天者聞廣樂之
音登暘谷者識若木之采百靈潛衛佇集於飈輪太一
下觀將傳於月筆並言共諧於誠誦期永播於無疆

謝賜御製寵行詩表

臣某言真區將命方戒於修岐鴻藻寵行亟頒於寶句
仍容賡載倍積兢惶中謝臣聞承元首之歌有虞所以

戒羣后賜威鳳之賦太宗所以獎勲臣實曠世之殊榮
固逢辰之至幸恭惟尊位皇帝陛下通微作睿宣哲亶
聰懿文德以化人積精衷而順帝昨以仙游報降道誨
昭彰紀令節以惟寅範粹儀而有穆爰考降靈之地實
當保魯之封仰體密都肇營恭館庶工締構方程龍密
之規上聖欽崇將達齊明之意臣獲膺朝旨恭薦令芳
咫尺威顏乍違於幄坐昭回烈采遽賚於雲章顯尊祖
之孝思繹多能之睿意薰風流韻承露均和仍推逮下

之慈曲軫遵塗之念瀝丹誠而拜賜曷報於恩私竭累
氣以賜言尤增於戰越周章感激倍萬常鈞

謝御製和詩表

臣某言飛霄寶句方極於游揚堙耳庸音誤陳於歎詠
曲荷大明之德旁流下濟之輝祇誦兢榮罔知攸措中
謝伏惟尊位皇帝陛下九功成裕六學宣精祖武宗文
允隆於繼述尊道貴德務極於欽崇以是景貺有開元
符申錫丕顯齊明之志講求希闊之文蒼壁黃琮載揚

於聖統飈輪藻衛遽接於仙遊誕昭長發之祥茂降聿
懷之福精衷滋勵景命惟新寶縷凝祥肇開於節令玉
書先道將歟於真祠載嚴昭事之規爰著頌宣之作運
寶跼而繹思披綠蘊以游心妙神化以為言協洞章而
成韻靈場夜誦初贊於純禧魄寶下觀亟彰於美應臣
幸齋恭館獲聽妙音穆王瑤水之歌意殊於祇畏武帝
交門之曲事異於朝修載惟淵妙之辭深貫希微之指
爰陳陋倡仰紀鴻徽顧蕪累以為憂實兢慚而失次宜

謂有來斯應務洽於至仁無言不酬靡遺於庶物俯答
擊轅之響載流章漢之輝昔者繼元首之歌但見賡颺
之盛賜威鳳之賦本無屬和之榮夫何孱庸被此優渥
敢不誓心金石竭慮夙宵報聖明尤異之恩盡衰朽頑
駑之力怔忡戰越倍萬常鈞

謝表

欽承溫詔靡允丹情仍俾斷於來章重難煩於睿聽黽
俛祇戴周章失圖臣某誠榮誠感頓首頓首竊以節制

諸侯實隆於間寄平章庶務允正於台衡苟文武以兼
資乃人臣之極致自非功高命世德重端朝則何以仰
副帝俞俯諸民聽如臣者行非中矩學不傳經爰當筮
仕之辰止冀代耕之祿不意妄階榮進誤踐亨衢兩朝
日月之暉繼叨於三接二府鈞樞之地並遂於再登莫
廣益於大猷徒宴安於高位載惟昧進常慮疾顛方避
寵之是圖冀變盈之可道豈謂遽膺綸綍特授旌旄仍
兼秩於島司復增封於采邑省循所至震悸尤深敢將

有覲之顏更竊無功之賞爰再通於奏牘願必寢於徽
章何期渙汗之難收敢不怔忡而祇受此蓋尊位皇帝
陛下仁惟宥物道在包荒簡自清衷俯推茂典蓋靡拘
於常牒用特聳於榮觀命等鴻毛固無階而報德心同
白水唯沒齒以銜恩感懼兢榮倍萬倫品

謝所撰內藏庫記刻於御製碑陰表

臣某言伏奉勅命以臣所撰內藏庫記刻於御製碑陰
者奮睿藻於鸞龍特俞勤請勒庸音於金石曲示鴻私

仰荷恩榮何勝隕越中謝伏念臣辭惟蕪累學不詳明
幸際會於昌辰獲叨塵於美任昨以增修帑藏詔令撰
述記銘遂搦朽以成文遽殺青而奏御恭以國之內府
九貢所登必須鎮以乾文千齡共永亟削章而陳請俄
出綍而允從伏見神筆金相天才雲煥韻六同而合律
懿五色以成章經緯古今發揮造化多士莫闕於聖域
下臣敢望於清光宣期尚采庸虛過垂優假俾錄雕蟲
之作仍刊翠琰之陰雖日月所臨燭火盡消於光耀奈

英莖在上鄭聲愈覺於滔埋念藏拙以無從荷包荒而有素更勵傾輸之節少酬樂育之私

代人生日謝恩表

臣某言君賜克臨私門增耀戴揣庸虛之質罔勝寵異之私拜捧已還兢皇失措中謝伏念臣時才素淺學術非長徒以際會鴻名叨承樞近巖廊充位但循奉於成規武帳承顏莫將明於大政實素餐之滋久常內訟以居多豈謂尊位皇帝陛下道廣含容仁深亭育體堂陞

務高之意極君親逮下之心每優假於恩輝庶保全於
短拙洎臨生日曲記清衷命幼息於公朝奉皇恩於私
地兼衣駿駉既極於殊榮嘉幣良金彌彰於異禮曳婁
非稱捧戴何勝負山而蚊力失疲向日而葵心自切敢
不竭誠夙夜立効涓埃誓堅持節之心遙上捧觴之壽

代人進禮成宴詩表

臣某言伏以福時報終方頒於宴衍寶跗宣麗爰播於
珍祺叨仰止以為榮顧乃賡而多媿伏惟尊位皇帝陛

下清明有度聰哲惟新祇奉綠文恭朝於真里欽陳蒼
壁茂對於景靈方襲吉於嚴宸遽示慈於折俎仍播栢
梁之高韻式昭宣室之蕃釐煥二帝之上儀總百王之
能事臣等幸陪鵷序獲賜雲章徒榮測管之闕敢繼鈞
天之韻但強抽於軋思用仰瀆於凝旒颺媿兢惶陪萬
倫等

代人謝弟端授官表

臣某言伏蒙聖慈特授臣弟端將仕郎守潁州萬壽縣

主薄者慶流霄極寵被天倫感懼所深心願靡措中謝
伏念臣藝能淺昧冒緒單平幸會休期妄階榮進加以
朝無近戚世乏先疇老幼聚居盡資於廩祿甄陞非次
皆出於宸恩常自誓以丹情冀少伸於芻効而夙宵一
志中外十年縱勵顓蒙絕無規益豈合近持私懇更瀆
惟聰蓋以臣弟端年已長成幼同艱苦先臣盡節顧遺
體之可矜母氏垂年實鍾愛而斯甚是用仰援赦令遽
奏封章載揆僭踰尤深震慄豈謂伏蒙皇帝陛下曲垂

寬宥深惻上仁濬發德音亟延賞典特寵私於微物用
俯激於忠規命等蜂蟻雖莫醺於恩重志懷霜雪誓其
率於官常庶傾塵霧之誠上報穹旻之施

代人陳乞為父修神道碑表

右臣輒瀝懇誠仰干睿聽退循僭易俯積兢惶伏念先
臣贈某官某本以遭逢累塵事任蒙聖明之過聽膺命
數以斯隆大化俄臨昌辰難戀荷皇慈之惻下豐賻贈
以飾終顧荒隧之已封而溫珉之未勒將周施於事實

必繫屬於時才其神道碑欲望聖慈特命某官修撰所
冀幽局不昧俯旌遊岱之魂宰木增輝永示漏泉之澤
苟俯從於哀懇唯仰戴於宸私激切周章期於得請

笏記

謝恩笏記

皇子新授具銜臣某言伏奉制命特授臣前件官者伏
念臣幸膺真緒獲奉皇慈大慶方成鴻恩曲被仰荷眷
懷之造永堅忠孝之心

文莊集卷十一